

(٨٥)

إشرافات جديدة

إسكندرية

برواز تانى

شعر

أحمد توفيق

دراسة:

هيثم الحاج على



الهيئة المصرية العامة للكتاب

٢٠٠٢

إشرافات جديدة
تصدر عن الهيئة المصرية العامة للكتاب

رئيس مجلس الإدارة
د. سمير سرحان

رئيس التحرير
عبد الوال الجمامصي

مدير التحرير
حزین عمر

سكرتير التحرير
أحمد توفيق

المخرج الفني
صبرى عبد الواحد

تصميم الغلاف
الفنان محمود الهندى

الإهداء

إلى :بن أخى «محمد»

إلى أبى وخالى على

إلى روح أمى

وإليها حين نلاطفها ؛ فتضحك

ويولد كل يوم فى بحرها

وعلى شطها

وبين بيوتها وحوايرها

عاشق جديد

أحمد

إسكندرية

بروازقانى

المغنى :

دقّ..

دقّ..

دقّ..

عود.. ونأى .. ورقّ

دقّ.. رقّ قلبه

لما شاف حبايبه

شابكين الأيادي

وطالعين الشطوط

رقّ.. رقّ.. رقّ..

قرّب ثانى منا

لما قام .. وغنى

للمينا القديمه
والناس
والبيوت
خش .. خش .. خش ..
شيع للحواري
غنوه نغمها عالي
ركبنا السفاين
طلعنا الصواري
دق .. دق .. دق ..
رق .. رق .. رق ..
خش .. خش .. خش ..

خش لقاها هي
قاعده إسكندريه
بالطرحه الجميله
والضحكه النديه
دق .. دق .. دق ..
رق .. رق .. رق ..
خش .. خش .. خش ..

الشاعر:

الشريط

بيلف.....

بحرى

والشاطبي

اللبان

والورديان

فى كل مكان حكاية

اسكندرية بتبص على

وتخش جواى...

.....

الترماى لحد دلوقت

ماوصلش شارع الرحمة

تهت جوه البحر

ماقدرتش المحها
ولا هي قدرت تلمحنا ..
اسكندريه غابت
وهي زي ماهي ..

.....

قاعده قدامي
رافضه تتكلم
ورافضة تسمع كلامي ..
نفس اللقطه بتتكرر باستمرار
الليل صاحي
والكورنيش مليون
احباب ..
واغراب ..
ناس بتونس

وناس بتخوف
ناس عاقلين
وناس مجانين
واحنا قصاد الشباك قاعدين
بنبص ع البحر البعيد ..
ونغيب.....
.....
على بعد امتار مننا
مزيكا
وينات بترقص
كل ما ابص فى عنيتها
واسرح
تاخذنى الموجه جوه الليل
انام .. احلم

افوق .. احلم
عروسة البحر دلوقت
بتلف زى البيوت
وتعدى برّه الشباك
تسيب فى عنبي
خيالات كتير واحلام
مش قادر احكمها

.....

صوت غريب
بيردد دايمًا فى منامى
انت جوه البرواز
ولا براه
البنّت
البحر

الميه
الموجه اللى رايعه
الموجه اللى جايه
حقيقه ولا منام
انت فعلا فى اسكندريه
ولا لأ
.....

تعالوا نوقف اللقطة دى
عند البحر
والبنات
ونحبسهم جوه البرواز
ونبقى نرجع لاسكندريه تانى
عند دار سماعيل . .
اللبان . .

المحطه ..

نرجع الترمای العبيط

تانی للشريط

يلف

.. ويكمل ..

.....

الغنى :

زمان
لما كان الشط خالى
إسكندريه لساها هي
كنت الف الأرض وارجع
الأمل مالى عنيى
ولما بتضيع إيتسامتى
ويا طيارتى الورق
ألقي فى عيونك ملامحى
باهته شتتها القلق
تبتسم لى عينيكى
أضحك
تانى يرجع لى الأمان
زمان . .
زمان . .

الشاعر:

الجاى
زأى الحاضر
زأى اللى فات
إسكندريه ولاد
إسكندريه بنات
مره بتيجى مبوزه
ومرة بتيجى مدندشه
تطلع على الموج بالغريزه
تبعت البصة اللذيذه
ضحكات لذاذ
إسكندريه الفرحة صوره
بتنط م البرواز
إسكندريه عروسه محبوسه

جوه فترينة إزاز

.....
صور بتجرى على الطريق

إجابه واحده

ومية سؤال

.....
صور . .

صوره مسئوله

وصوره مش مسئوله

صوره بتقول لى

وصوره باقول لها

صوره من عندى

وصوره من عندها

ياااااااه

الألبوم مليون أَلغاز
علامات استفهام كتير
مش قادر أوصل لها ..
صوره بتطلع من الألبوم تتنطط
تقول كلام
تحكى لنا
ونحكى لها
توصل حبال الود
ونوصلها
صوره بتشغلنا
وصوره بنشغلها .
.....
لقطات كتير
وأحلام متدوره

مره بتطلعنا لقدام
ومره بترجعنا لورا
لقطه تجمّعنا
ولقطه تفرّقنا ..
اللقطه دى
عند السلسله فى الشاطبي
تغيب ..
وتطلع من التمثال
تخط إيديها لتنين فى إيدى
تبتسم وتبص فى عينى
«إمسكى الألبوم .. وفريه واحده واحده
فريه واحده واحده ،
البحر خدنى ..
البحر جابنى

.....
وأنا لسه موعود
قاعد مع نفسى ع الشط
وهى مالهاش وجود
.....

لحظات..
دقايق...
ساعات....
سنين من روحى
ومن وقتى..

.....
اللقطه دلوقتى
بترجعنى وبهاها
لليوم إياه:

«الناس ملمومه حوالينا
واحنا قاعدين مع بعض
ع الأنتريه النيبتي
فى شقة قرايينا.....
إيد بين إيدى
بتووه
وايد بتمد لى حته جاتوه.....»
أغيب.. وارجع لنفسى
أشوف كل شىء مش طبيعى
البحر خاين
والناس متغيرين..
«من غير ما تغضبى
وتدلقى دموعك فى سدرك
إقفلى الألبوم

ورجعى الشريط..

اتخيلي

أيوه.. إتخيلي

إتخيلي البحر السلسله الشاطبي

.....

كافيتريا بحرى

إتخيلي

ياااه.....

لحظات بتسعد

ولحظات بتوجع

.....

لقطات كتير بتبعد

ولقطات كتير بترجع

ترجع تانى للبحر

توضّح العناوين
وتجدّد الذكريات....

.....

ساعات تبويزه
تعكّر صفو الحياه
وساعات إبتسامه ملونه
ترجع تحط ع الشط تانى
إجابات جديده
وحبة أسئلة

المغنى:

من زمان
ضحكة البحر المكان
فكرونى بيوم ماكان
لسه فى العالم امان
كنت عيل
هى حلمى ومبدئى
كل ما تغيب عن خيالى
وحالى يفضل يبكى حالى
ترقص الموجه ف منامى
فى منامى وملتقى
اجرى
ألحق موجه جايه
تطلع البنت الشقيه
من السما

في المغربيه
تحدف الميه ف عنبي
القلم يخطف ايدي
ويرسم البحر الشقي
كنت عيل
هي حلمي ومبدئي
كنت عيل
كل ما احلم من جديد
اكسر الموج العنيد
تنحبس احلامي في
تجري
تهرب هي هي
تستخبي مني لي
في عيون اسكندريه
في عيون اسكندريه

الشاعر:

زعلانه ..

.....

أمانه عليكى

تقولى ..

اتكلمى ..

مش إنت اللى اخترتلى الصوره

مش إنت اللى ضحككتى على البحر

حددتى حدود الموج

ورميتى قصاده الحلم

.....

أمانه عليكى

ماكنتيش عارفه

إن الطريق
بين الميه وبين الشط
مش مجرد مشوار
مش مجرد حلم صياد
يصطاد له بلطيّه
مش مجرد تنهيدة صبيّه
بتنطق سدرها فى الهوا
بوح
أمانه عليكى
ماكنتيش عارفه
إن المسافه بين السفر والرجوع
بداية موت
بداية موت

وإن اللي بيبيعد بين إسكندريه والبحر

مش مجرد شط

وميّه..

وناس..

مش مجرد حبة مساطيل

واقفين ع الصخره

يغنوا للبحر البعيد

غنوة الولد الغريق

والبنت الحزينه

.....

أمانة عليكي

ماكنتيش عارفه

إن إسكندريه من غير البحر

خراب

وإن البحر
من غير إسكندريه
توهه
يااااااه
دلوقتي بس
رجعتي للحقيقه
رجعتي للبحر
والموج
والمكان
دلوقتي بس
عرفتي
إن الأمان
أبعد بكثير
من زفة العرس

ولمة القرايب..

.....

دلوقتى بس

رجعتى تقفى من جديد

على ناصية شارع الرحمة

تفتكرى اليوم المشهود

وانت بتبصى بحنين

على طوابير الناس الرايحين

الجايين

مستنيين

لحظة رجوع الروح

أمانة عليكى

زعلانه ليه

.....

المغنى:

زعلانه ليه.....!؟

بتخافى من ضحكة شفايفك ليه

زعلانه ليه.....!؟

.....

ليه بتشتكى وتلومى منى على

هربتى ليه من أحلامى

وكتبتى أحزان أغانى

بتقولى إيه.....

زعلانه ليه.....!؟

أنا مش غريب

ولا باحلم الحلم العجيب

ولا غابت المركب بى

طرحى نصيبك
لو تجمعى
الريح حاتصيبك
لو تبعدى
الموج حايجبك
تعبت لعب الشوق بى
دبلى دموعى وليالى
زعلانه ليه.....!؟

.....

يا غنوتى وفرحى وكونى
يا طرحة الموج
وجنونى
إن كنتى مش قادره تثورى

على قسوة الموج
وتدورى
هزى اللى جواكى
وقولى
قولى
لفى فى وسط بنات حورى
كونى غناى ومأثورى
قولى كلام
كده والسلام
يمكن يعود لى الأمان
برضاى أو مغصوب عليه
زعلانه ليه.....!؟
.....

قَرَبْتُ لِيهِ.....!؟

بَعَدْتُ لِيهِ.....!؟

لِيهِ .. لِيهِ .. لِيهِ ...

غَفَلْتُ

طَلَعْتُ جَنِّيَّ

دَارْتُ وَلَفْتُ حَوَالِيَّ

سَرَقْتُ عَنِّيَّ

وَفِي الْمِيه

بَصْتُ وَغَابْتُ

فَيْنَ هِيَ!؟

رَاحْتُ مَعَ الْمَوْجِهِ الرَّايِحِهِ

رَجَعْتُ مَعَ الْمَوْجِهِ الْجَايِهِ

ظَهَرْتُ عَلَى الشَّطِّ صَبِيَّهِ

مليانه ضحك وملاغيه
إسكندريه الشصليه
عمّاله ترقص فى عنبيّ
وتقول كلام
آخر غرام
آآآآآه ياسلام
إنت عيونك تايهه ليه .. ؟
زعلانه ليه

الشاعر:

المركب دى
مش هى المركب
اللى كانت معديه إمبراح
قدام كافيتريا الشاطبى
واحنا قاعدين ع الرصيف
نحذف الموج بالطوب
ويحذفنا الموج
بالبنات

.....

المركب دى
مش هى المركب
اللى كانت معديه إمبراح
شايه الحياه

بنت وولد..

حبیبین بیحلموا بحته فاضیه ع الکورنیش

بیاع ترمس

وبتاعة ورد لطیفه

ما بتعرفش تغلس زى الثانیین

.....

المركب دى

مش هیّ المركب

اللى كانت معديه إمبراح

قافنه الباب

قدام الموج...

وفاتحه الشابیک عن آخرها

لولاد البحر

والجنّيات ..

.....

المركب دى

مش هى المركب

ولا دى البنّت

اللى كانت واقفه فى الميه إمبارح

بتدور الموج

حوالين خصرها العريان

ملاية لف

.....

ولا دا الولد

اللى كان دايمًا

سرحان فى عيون إسكندريه

بيفكر فى بكره

والحلم الكبير

.....

المركب دى

مش هى المركب

والشط دا

مش هو الشط

والناس دول

مش هما الناس

كل اللى أنا شايفه دلوقت

شوية أسماء وعناوين

مجرد أسماء وعناوين

ويس

.....

المغنى :

مركبه نايمه
على الشط الحزين
وف شارع المينا القديم
فى اسكندريه
المركبه دى
هى ومش هى
مركبه جنيّه
طايره على الميه
كل الولاد والبنات
م الصبح مستنّيه
ضحك وملاغيه
مركبة حطت
مركبة نطت

ميته او حيّه
ع الشط ولا
على الميه
المركبة دى
هى ومش هى
كل اللى نقدر نسأله
كل اللى نقدر نفهمه
كل اللى نقدر نعمله غيه
مركبة رايعه
مركبة جايه
بس اللى فاضل منها
مركب بتعرف زيها
تروى القلوب من عشقها
بس اللى فاضل منها

ذكرى السنين
وجع الحنين
وكمان حكاوى الفضفضه
وحبة خشب
متحصرين
المركبة دى
هى ومش هى
ميته او حيه
ع الشط ولا
على الميه
لساها فى عنى
نايمه على الشط الحزين
وف شارع المينا القديم
فى اسكندريه

الشاعر:

البحر النهارده غامض
رغم الضحك
والدلع
والسهاد
شئ ما كانش أبداً مريحنى
واحنا بنبدأ أول خطوات الحياه
كنت حاسس ساعتها بالاغتراب
ماكانش شعور بالتفاؤل
ولا كان شعور بالاكنتاب
حاجات كتير من إيدينا بتروح
ياخذها الموج
وتغيب معاه
وحاجات بتفضل معانا

تقلب الذكرى تانى
وتستنى طوق النجاه

.....

مع كل يوم بيمر
تتولد حكايات
مع كل يوم بيمر
بتموت حكايات
مع كل يوم بيمر
البحر ينسى المشاعر
والليل بينسى السكات

.....

لسه الأراجوز المكار
واقف على عتبة دكانه
يذوق لوح الأبلakash المخوخ

بالشمع
والكذب
والبدن المستعار
«بانت ملامح التحفز في عنيها
لحظة ما سمعت صوته
وهو واقف على ناصية الحاره
بينادي على حد من الجيران
جريت بسرعه على البلاكونه
وبدأت معاه
المناغشه ..
والملاطفه ..
والكلام ...
لسه التبويزه الغبيه في وشها
بتخبى من كذبها الغبي

دمعه بتشتكي
بالكذب
كدبه بتكبر بكديه
وكديه بتفضل بريئه
ضحكه
وكديه
وضحكه
ختمت بكديه جريئه
تنكر
وتكذب
وتنكر..
وتخاف تقول الحقيقه
طلعت أغنى ف هواها

وہی طلعت معای
کل ما اصرخ
واغنی
تہرب..
ویہرب غنای.....

المغنى:

شفتى إزاي؟!؟

شفتى إزاي؟!؟

أحلامي عجيبة

شفتى إزاي

أيامى صعيبة

مرة قريبة

ومرة بعيدة

مرة عدوه

ومرة حبيبه

مرة على

ومرة معاي

شفتى إزاي؟!؟

.....

شفتیٰ ازای.....!؟

شفتیٰ ازای.....!؟

الحلم ف لحظه

یبقی الماضي

اليوم

الجای

شفتیٰ ازای

شفتیٰ ازای الحلم راودنی

شفتیٰ ازای الحلم عاندنی

شفتیٰ ازای

الحلم غریب

شفتیٰ ازای

الحب عجیب

کل ما أقرب منه

أَتَغَرَّبُ
كل ماعيني تتوه
بيقرَّب
كل ما أحب أكون وياه
يبقى في حصني
ومش وياي
شفتي إزاي.....!؟
شفتي إزاي.....!؟

.....

الشاعر:

فاضى

ولا مليون

بالقلق

بتحلم

ولا موهوم

بالحب

خد بالك يا صاحبى

إمسح الدمعه اللى نازله

على خدك

.....

.. بتودها.....!؟

طب هى بتودك.....!؟

.....

باين فى عينوك

نظرة اشتياق

خد بالك

من البحر

والميه

والناس

من لذة القرب

ومن وجع الفراق

من كل الحاجات المحسوبه عليك

ومن كل الحاجات المحسوبالك

خد بالك يا صاحبي

خد بالك

.....

العمر بيمر

مع كل خطوه...

بتتسرق منك
وانت غرقان...
جوه حوارى إسكندريه

.....
لسه بتستعذب طعم الإهانه
لسه بتاخذك رجلك
ناحية البحر
تقعد على كرسى
فى كافيتريا الشاطبى
تشرب كوباية الحاجه السافعه المليانه
وكانها مستنياك
على نفس الترابيزه
من أكثر من سنه
لسه بتاخذك رجلك

لأى مكان
يدخلك الوهم
ويطّلعك من تانى
برّه دايرة الوقت
لسه الأماكن ده
بتفكرك برضو بأيام
رغم مرارة طعمها
فيها لون الحياه

.....

ياااااااه.....!
يااه يا صاحبي
ياااااااه.....!
حاتفضل على طول
كده مشحون

حا تفضل على طول كده
 تدور في دماغك
 وتعصره
 مره تطلع من البرواز
 ومره ثانيه
 تدخله
 حاتفضل كده واقف
 على ناصية شارع الرحمه
 مستنى آخر ترمى
 يوصلك المحطه
 ياااااااااااااااااااا.....!
 يا صاحبي .. ياااه.....!
 ياريت ترجع لنفسك فاضى
 بنى آدم عادى

فاضی..

زای کل الناس الفاضیین

ما بيعرفش يفهم البحر

ولا يغلب الموج

ولا يحسب المجهول

يااااااااااااااااا.....!

یا صاحبی

إنت فاضی

ولاً مليون بالهموم

بتحلم

وَلَا لِسَاكٍ مُّوْهُومٍ

المغنى:

كان لى
صاحب فاضى
ما لوش أمل بكره
ولا له
زمن ماضى
كان لى
صاحب فاضى

.....
فى يوم
من الأيام
رأيت فى الأحلام
ماشى شريد قلقان
وعيونہ متغيره

سألته:

ليه ياترى....!؟

قال لى: يادوب حسيت

غدر الزمان سهانى

وسرق سنينى كيد

قلت له: يامسكين

إنت أكيد

حبيت

ردد بقلب حزين

.....

كان لى

صاحب فاضى

ما لو ش أمل بكرة

ولا له زمن

ماضى

ردد بقلب حزين
واقف بقالى سنين
قدام مدينتها
مشتاق لنسمة هوا
مشتاق لضحكاتها
كان لى
صاحب فاضى
ما لوش أمل بكرة
ولا له
زمن ماضى

فضل يردد..

وانادی
وهو شارد قصادی
جريت عشان الحقه
لقيت السهم ماضى

كان لى
صاحب فاضى
ما لوش أمل بكرة
ولا له زمن
ماضى
كان لى
صاحب فاضى

الشاعر:

الترماى بيتطوح
الغيمه بتخبى البيوت
ويتغطى الطريق
كل الحاجات متلغبطه جواى
ياصاحبى
إنت طيب ولا لئيم...!
ياأخى..
مش كل إحساس بالمهانہ
يبقى مهين
ولا كل إحساس بالكرامه
يبقى كريم
أحيانا الوحده
تبقى الحبيب
والقريب

والصديق

حببت ..

أيوه حببت

حببت واتخذعت

وطلعت لسابع سما

وزاى ما طلعت

رجعت

رجعت ورميت من وراى

كل الخيال المر

وحدود المكان

الزمان.....!

أيوه الزمان

لما يرجع لنا ويلم

كل القرايب
والحبايب
والجيران..

.....

هنا
ولا.. هناك.....!؟

هناك
ولا.. هنا.....!؟

هنا
كنت بالعب الكوره الشراب
والبلى فى الحاره
هنا

كنت بأوص الأوصه
وافك الدوباره
أضبط الميزان

وأطير الطياره

هنا....!؟

أيوه هنا

كان البحر بلطيه

وعيونى سناره

هنا..

وهنا..

وهنا..

لحد ما يغيب الكلام

ومايفضلش من الأحباب

غير البرواز

والبحر..

واسكندريه

المغنى:

دقّ..

دقّ..

دقّ..

ع البيان

وغاب

ساب ع الخد دمه

وكلمتين عتاب

دقّ.. دقّ.. دقّ..

دقّ..

ولما دقّ..

قلب الدنيا رقّ

.....

طار الموج علينا

قَرَّبَ حَسَ بَيْنَا
ولما حَسَ دَاب
دَاب القلب دالاب
دَقْ..دَقْ..دَقْ..
ع البيان
وغاب.....
موج البحر بَلَم
موج البحر قال
قال لى: آآآآه
ولأ
دَقْ..دَقْ..دَقْ..
موج البحر عَلَم
موج البحر سَلَم
قَلَب فى السؤال

وما قالش الجواب
موج البحر داب
موج البحر داب
دق.. دق.. دق..
ع البيان
وغاب
ساب ع الخد دمع
وكلمتين عتاب
دق.. دق.. دق..
دق..
دق..
دق..
.....

الشاعر:

تعالوا نوقف اللقطه دى

عند البحر

والبنات

ونحبسهم جوه البرواز

ونبقى نرجع لاسكندريه تانى

عند دار سماعيل

اللبان

المحطه ..

نرجع الترمای العبيط

تانى للشريط

يلف

ويكمل ..

خروج

دخول ←

المغنى

دی :

دی دمه ..

ولا ایتسامه.....!

دی محبه ..

ولا ملامه.....!

قریت من عینی

عینی

طلعت من نن عینی

وفضلت هایم وحید

شایف بینك وینی

موجة وقارب بعید

خلف السور الحديد

وقمر لما یلاقینی

وتونس عینه عینی

يتفرّق في الليالى
لحظة ما يغيب قبالى
عند نهاية العلامة
يرجع يندهنى تانى
ويتمنالى السلامه
دى دمعة..
ولا ابتسامه.....!
دى محبه..
ولا ملامه.....!

.....

غريب..
غريب فى ليل عجيب
أسرح وأخطف عيونى
منك

واللى يلومونى

تنطق

تسكت

تخبي..

.....

تنزل

تطلع

لقلبي..

.....

تفضل ع الموج

تغيب

قريب أومش قريب

برضك إنت الحبيب

وعيونك حيرونى

على إيه
بيقولوا ياما
عنك
وييسألوني
على إيه بيفكرونى
ياقمر ياغاوى جرحى
بتعكر ليه ملامحى
تغضب وتطفى فرحى
فى التوهه
وفى الغيامه
دى دمعته ..
ولا إنتسامه.....!
دى محبه
ولا ملامه.....!

إبعدى

ما تكرر ريش كلامك
ما تبرر ريش خصامك
رغم الرجوع لجرحك
والحزن اللي ف ملامحك
أنا مش ممكن حاسامحك
أرجوكى إبعدى
أرجوكى إبعدى ..

.....
اسامحك فى اللي لى
فى الحق اللي عليكى
والحق اللي على
أسامح لما أتعب

وتغلبنى السنين
فى الدمع اللى بيجرى
فى عيونها الكدابين
أسامح لما أهون
وتتوه جوّه العيون
الفرحه
وتنطفئ
أسامح لما تمنع
أسامح لما تمنح
أسامح لما ترجع
لقلبى
وتهتدى
أرجوكى إبعدى

أرجوكم إبعدي

.....
يمكن أنسى صدودك

الورد

اللى ف خدودك

بعادك

أو

وجودك

يمكن أنسى سؤالك

الحلم اللى ف خيالك

لكن..

مش ممكن أنسى

غنيوه كتبتهالك

وكننت عايزها تفضل

ذكري تنور

طريقي

وترجع فرحتي

أرجوكي إبعدي

أرجوكي إبعدي

.....

.....

وأنا كلى

قلق

وحيره

قضيت ليله عسيره

باعائبك يا أصيله

ناهت أحلام كثيره

ويا الصورة الجميله

اللي رسمها

خيالى

ومسحتها بيديكى

أنا مش حا لوم عليكى

أنا مش حا لوم عليكى

.....
ما تكرريش كلامك

ما تبرريش خصامك

ما تبرريش خصامك

رغم الرجوع لجرحك

والحزن اللى ف ملامحك

أنا مش ممكن

حاسامحك

أرجوكى إبعدى

أرجوكى إبعدى

رجاء

رجاء

يا أقطه

يا زربونه

تبصى تانى

من الصوره

رجاء!!!!!!!!!!!!!!!

.....
جوايا أيام مطويه

وانت يا ضحكه مخيبه

جواكى فرح

وملايه

إدينى حبه حنيه

أديكى أحلام

من الصورة

ألمح وشوش الخلق

رجاء

أدخل لها

جوه البرواز

یا تبص تانی

من الصورة

رجاء

ويعد

وقرب

وشوق

نفسی اخطفاك

یا خیالی

لفوق

قَلْقَان

وطول الليل محروق
سهرانا عيني المفتونه
مطرح ما أبص
ف قلبي رجاء
تطلع تبص
من الصوره

.....

رجاء
يا أقطه
يا زربونه
تبصى تانى
من الصوره
محتاج أنا
منك

قوله
تكون حنونه ومستوله
يمكن ياخذنى الحلم
أروق
أرجع أغنى
وأنط لفوق
كأنى طفل ف سنه أولى

رجاء
ياأقطه
يا زربونه
تبصى تانى
من الصورة
رجاء|||||||اء

أحيانا :

أحيانا.....!

أحيانا تتغرب فينا

روحنا

وأحلامنا

وأمانينا

أحيانا.....!

أحيانا دمه تفرحنا

أحيانا بسمه بتجرحنا

وأحيانا بنروح مطرحنا

على البحر

ونشكى لبعضينا

أحيانا.....!

أحيانا تبهت ضحكنا
أحيانا تفضل دمعنا
تأيهه ويتوه سكتنا
فى الليل
والبحر
وف عنينا
أحيانا.....!
أحيانا بنام نلاقينا
بحرى وفى الشاطبى لوحدينا
قاعدين بنقلب فى ماضينا
أحيانا.....!
أحيانا.....!
أحيانا.....!

.....

عدى..
عدى.. ويس
عدى يادوب الحلم ويس
بص.. وعدى
وعدى.. ويص
عدى وساب الروح والحس
عدى وسلم تانى علينا
رجع أحلامنا وأمانينا
أحيانا نلاقيه
يلاقينا
فى الناس
والشارع
والمينا
أحيانا نلاقيه
يلاقينا

على الصارى
وعند التراسينا
أحيانا نلاقيه
يلاقينا
فى الميه
وعلى ظهر سفينه
أحيانا.....!
أحيانا نلاقيه جوانا
فى عيون مجنونه وغلبانه
أحيانا بندوب فى هواه
وأحيانا بيدوب فى هوانا
أحيانا.....!
أحيانا.....!
أحيانا.....!

.....

ناسك أهله
وأهلك ناسه
ليه برد الدم ف إحساسه
أهلك ناسه
وناسك أهله
أحيانا يندّه
ننّده له
أحيانا يسمح
نسمح له
أحيانا بيحن علينا
يمسح بإيديه دمع عينا
أحيانا.....!
.....
أحيانا بيغيب

ويجينا
يخاصمنا
ويرجع يراضينا
أحياناً.....!
أحياناً يبعد
ونروح له
أحياناً يفرح
نفرح له
وأحياناً يسمع
وننبوح له
أحياناً.....!
أحياناً.....!
أحياناً.....!

.....

أحيانا بنعيش

وينسى

أحيانا بنرق

ونأسى

أحيانا..

أحيانا بدموع مجنونه

بنتلطف على كلمه حنونه

وأحيانا.....!

أحيانا بنبيع

وإن بعنا

تفرق مواضيعنا

فى مواجهنا

فى عقولنا

قلوبنا

ومسامعنا

وما يبقاش فى العالم معنى

ينطق

ويقول

ويسمعنا

غير ماضى

وذكرى

وأحيانا.....!

أحيانا.....!

أحيانا.....!

أحيانا.....!

خروج ←

دخول ←

الشاعر

الشتا
والبحر
الكورنيش
وليل إسكندرية
الصُور الكثير اللي بتتحرك دلوقت
برّه البرواز
هو اللي راصدها ؟..
ولا هي اللي راصداه ؟..
.....

قاعد على نفس الترابيزه
فى البورصه التجاريه
نظرات عنيه التعبانيين
بتطلع مع كل برواز
من براويز القهوه الإزاز

وتبص ع الشارع
طالع .. وداخل
داخل .. وطالع
صور ..
وصور ..
وصور ..
صوره بتودى
وصوره بتجيب
وصوره بترجع تاخذ عنيه
جوّه الميه
وتغيب

.....

العجيب
إن المطر

والضباب
ولسان الكورنيش البعيد
المفرد ع الناحيه الشرقيه
ما قدرش يخبى عن عينه
مكتبه إسكندريه ..
المنتزه
وكافيتريا الشاطبي
ماقدرش يخبى الخيال
ولا يخلع من جواه الحلم
الى مش قادر ينساه لحد دلوقت

.....

صف براويز
أيوه ..
صف براويز مترصصين

من اليمين للشمال
ومن الشمال لليمين
الصّور بتتحرك على وش الميه قدامه
صوره تقب

وصوره بتغطس
وصوره بتطلع لوّش الإزاز

.....

قاعد يرتب الصّور
ويحطها ف أماكنها
داخل البرواز
برواز حدف الصوره .. ونط
وبرواز طلق الصوره ع الشط
برواز شال ..
وبرواز حط ..

كتم الحنين للصوره جواه

واتألم ..

ساعة ما قام البحر واتكلم

برواز معلم ..

وبرواز بيتعلم ..

برواز

وبرواز

وبرواز

برواز خشب ..

وبرواز إزاز ..

.....

دماغه بتلف ..

وعنيه بتفتش فى الصور:

صوره عيل

الصورة دلوقت عيل
عيل صغير
كنت دايمًا با اشوفه
وهو طالع .. داخل
يلعب على باب بيت جدّها
ويتنطط ..
كل ما تطلب منه بوسه
يقول لها : كوك
وكل ما تطلب منه لعبه
يقول لها : كوك
كل ما تطلب منه يتف على حد
ما يرضاش ..
يتكسف
ويدارى وشه فى حضنها

وهو برضك يقول : كوك

.....
«الكوك دلوقت

طالع من صورہ قديمه

جوہ برواز من براویز القهوه

عمال يلعب ويلف حوالين البرواز

وهی کل ما تقرّب منه

عشان تحصنه زى زمان

يبص فى وشها

ويصرخ بكل امتعاض

من غير ما يقول لها : كوك

.....
يمكن يكون الكوك فى اللحظة دى

فاهم البحر اكثر منك

وانت لسه قاعد مشدود
على نفس الكرسي الموعود
بتبص تانى على البحر
وتشتكى همك

.....

صوره بنوته ..
الصوره دلوقت بنوته ..
نطت من جوّه برواز تانى
من براويز البورصة التجاريه "
قرّبت منه
وقعدت معاه ..
قالت له
وقال لها
قالت له : مش قادره افهمك

مش قادره احسك

وتجینی

قال لها :طبيعي

طبیعی ما تقدیرش تفہمینی

فرق كبير في السن والعقل والنضج

فرق واضح و باین

الاختلاف في التفكير شيء عادي

بس اللى مش عادى

اختلال الشعور

ومراوغة المشاعر

ياااااااااااااااااااا

جایه بتقوی دلوقت الکلام ده

بعد كل اللي كان

من قَرِبَ

ومن تفاهم
ومن أمان ..
اكيد الميزان مايل
ياإمّا انت خاينه
ياإمّا البحر هوّه اللي خاين ..

.....

صوره طفل ..
وصوره شاب
صوره عكاز ..
وصوره عجوز بيتعكز
صوره عدت ..
وصوره ما عدتش
صوره جات ..
وصوره ما جاتش

طلع الأراجوز
يتأرجز
إتبّل من المطر فباش
طلع النجار بشاكوشه
ذوّق العروسه الأبلakash
شكّلها وهندمها
وحطها جوّه الفترينه

.....

لما راح
رحنا
ولما جه
جينا
وقعدنا جنبه على القهوه
نبص للبرواز الأخير

البرواز اللى بيتحرك من اليمين للشمال
لأ ..

البرواز اللى بيتحرك من الشمال لليمين

.....

لسان الشط

اللى بيلف من عند فنار إسكندريه

هو برضك ما بيخبش وراه

القلعه

وكافيتريا بحرى

وشارع المينا القديم

ما بيخبش وراه

الناحيه الغربيه من الكورنيش

ولا خيالات الموج

ولا بنات البحر

اللى بترقص على غنا الصيادين

.....

هوّه

ولا..هى..!؟

هى

ولا..هوّه..!؟

إسكندريه ولا البحر..!؟

البحر ولا إسكندريه..!؟

قاعد لوحده على الترابيزه

سرحان جوّه براويز البورصه التجاريه

بيعافر يطلع دمعته صغيره

محبوسه جوّه عنيه

ومش عارف

خروج ←

جدل اكنمال الدوائر

قراءة فى ديوان أحمد توفيق
(إسكندرية بروازتاني)

هيثم الحاج على

«الكلمة» : جنى لا يقبع فى داخل مصباحه، بل يفتح
آفاق الرؤية حين يجوب العالم .

تلك هى الكلمة، حين تكون شعرا، وهذه هى الكلمة فى
خلق عالم متكامل حين تكون صادرة عن صوت يتمتع
بخصوصيته. ولا يمكن أن نستشئ من هذه الكلمة ما كان
منها عاميا، كما يفعل البعض حين ينظرون إلى القصيدة
العامية بوصفها قصيدة من الدرجة الثانية، فالحقيقة أن
الكلمة هى الكلمة، والشعر هو الشعر أيا كانت لغته أو
لهجته .

وليس أدل على ذلك من كون قصيدة العامية المصرية قد
استطاعت - خصوصا فى العقود العشرة الأخيرة - أن تخلق
لنفسها مسارها الخاص، المختلف، الذى يوازى - أحيانا -
مسار القصيدة الفصحى، ويسبقه فى أحيان أخرى،

معتمدة على قريبا الشديد من الارض، وأصولها المتجذرة
فى أعماق مجتمعا، وبراحها التعبى الأصيل المتحرر من
إسار قواعد الإعراب، وصرامة التركيب .

لكن تبقى الصعوبة الكبرى، أنك حين تكتب قصيد
العامية فإنك تقترب مما عبر عنه الجاحظ، أنت تكتب
«مما فى أيدى الناس وليس مما فى أيدى الناس». ويكون
عليك أن تستخدم كلمات يستخدمها العامة فى صنع عالمك
الخاص.

من هنا تتحقق خصوصية الشاعر، وتقوم على محاولته
الدائبة فى صنع دلالات جديدة لما هو قار فعلا، عبر رؤيته
التي يتفرد بها .

ولا نغالى إذا بدأنا حديثا بحكم، فقد تحقق لشاعرنا
«أحمد توفيق» ذلك الذى اشرنا إليه من خصوصية
الصوت، وتميز التجربة، وذلك عبر أدوات يحسن
استخدامها حين يعالج قصيدته، وهو ما قد ظهر - فعلا -
فى أعماله السابقة، والتي سوف نشير إلى واحد منها وهو
ديوان «برواز».

لقد تمثلت خصوصية ذلك الصوت فى خصوصية استخدامه للغة، ولا نعى هنا انتقاء ألفاظه من دائرة دلالية معينة، فاللغة ليست طبقية، ولكن نعى أسلوب التعامل مع هذه الألفاظ، تحقيقاً لرؤيته الشعرية، التى يمكن أن نصفها بأنها مشروع يعمل الشاعر على اكتماله.

وتتعلق هذه الرؤية من الذات، وعلاقتها بما هو خارجها، وما سوى ذلك يتبعه ويتأسس عليه، وهى الرؤية التى حين تكون الذات منطلقاً لها ومحوراً، فإنها تتعامل مع لغتها على هذا الأساس، فتظهر تجربتها - إبداعيا - خاصة جداً، قابلة للتعميم فى آن، لأنها لا تتفصل عن همومها وهموم أقرانها، وهى سمة فى شعر العامية، من الصعوبة والندرة أن تتحقق فى قصيدة الفصحى، حتى لو اعتمدت على المؤلف واليومى، فإن ميزة تبقى لقصيدة العامية، ألا وهى اعتمادها على ألفاظ العامة.

وهو ما يتجسد لأحمد توفيق حين يختار العامية مجالا تعبيريًا ينطلق منه إلى داخل ذاته محاولاً بناء شكل جديد للقصيدة، فيه من صرامة البناء وهندسته، بقدر ما فيه من حيوية الذات الشاعرة. وهو الأمر الذى يجعل من كل

قصيدة تجربة فريدة، يندر أن يتكرر شكلها فلا يسقط في
إسار القالب، بل يأتي البناء صدى للرؤية.

تحقق هذا في ديوانه السابق «برواز» من حيث الاعتماد
على أن الديوان وحدة متكاملة، وليس مجموعة من
القصائد، بل إن الديوان يمكن قراءته بوصفه قصيدة
واحدة، يتوازي فيها صوتان أحدهما شعري والآخر غنائي،
يخلقان معا علاقة جدلية على مدار الديوان تؤسس
لتجربة شديدة الخصوصية تركز على هذا الجدل بين
الداخلي والخارجي، والتماس بينهما الذي يكون الصورة
الشعرية القابلة للرؤية من كلا الجانبين، كلٌ بطريقته.

إن هذا التوازي - الذي نراه على مدار الديوان - يسهم
بدوره في إقامة بناء ثلاثي - ربما يشبه في بعض سماته
البناء الأرسطي - يعتمد على ذوات ثلاثة، وبناء حدثي يكون
صورة شعرية تنتفي عنها الاستاتيكية، لتخلق عالما مفعما
بالحركة، مما يضيف إلى القصيدة - عموما - بعدا جديدا،
يقترّب أكثر وأكثر من روح العصر الذي تصدر عنه، وتعبّر
عن تفاعلاته، وهو الأمر الذي أشرنا إليه من قبل في
حديثنا عن هذا الديوان «برواز».

وهو الأمر . كذلك . الذى سيدعوننا . عند النظر إلى الديوان الذى بين أيدينا . أن نتساءل عن العلاقة بما سبقه، تأسيسا على وجود بناء متشابه هنا، أياكون هذا الديوان الجديد مجرد «برواز ثانى»، أم أنه جزء ثان من ديوان أول أم أنه المشروع الممتد الذى يحاول أحمد توفيق عن طريقه شق مسار خاص فى المشهد الشعرى؟

لقد كان استخدام أحمد توفيق للصوتين فى «برواز» استخداما يعتمد على الاختلاف بين رؤية كل منهما، وطبيعة تكوينهما الناتجة عن هذا الاختلاف، لكنه الآن يرى الأمر بصورة مختلفة. فالشاعر يقلب الشكل الذى يستخدمه على أوجه مختلفة ويستغل إمكاناته التعبيرية المتاحة والممكنة، وهو مانراه واضحا فى «برواز ثانى» حين يكون أحد الصوتين امتدادا للآخر ومتما لرؤيته، وهو الأمر الذى يكمل دائرة الدلالة التى يفجرها أحدهما، فلا يكون المقطع انعكاسا للمقطع، لكنها الرؤى تتجاور تتجاوزا يعكس وحدة عضوية من نوع جديد، وحدة لا تعتمد على التابع السببى بقدر ما تركز على تجاوز العناصر شريطة ألا يطفى أحدها على الآخر. هذا التجاور الذى اعتمد

على التكامل لم يكن موجودا حين كان الهدف جدليا فى الديوان الأول، حينها كان هناك مقاطع بلا عنوان، تدل على حركة الذات الشاعرة/ ومقاطع أخرى معنونة بالمغنى. أما فى «برواز تانى» فإن هذه الرؤية التجاورية التكاملية تتبدى عبر عدة عناصر أهمها :

. الاستخدام الأشد تحديدا لصوتى «الشاعر» و «المغنى»، وعنونة مقطع كل منهما، و استخدام هذا التحديد فى أن يودى كل من الصوتين وظيفته الأساسية فى أن يُسلم إلى الآخر، مع كون ذلك الشكل مؤديا إلى اكتمال الرؤية الشعرية، وهو الأمر الذى يجعل من القصيدة/ الديوان حركة دائية .

. ولكى تتم هذه الحركة فإننا نلاحظ ذلك الشكل التتابعى فى البناء حين ينطلق أحد الصوتين من لفظة/صورة/جملة يستخدمها الصوت الثانى فى مقطع، فتصبح هى نقطة انطلاق المقطع التالى، وهو ما يحدث عندما تكون نهاية المقطع الخاص بالشاعر تقول: «أمانه عليكى ... زعلانه ليه»، لىبدأ المغنى مقطعه الغنائى، مستخدما هذه الجملة لازمة لفوية له يؤسس عليها مقطعه

التالى مباشرة: «زعلانه ليه ... بتخافى من ضحكة شفايفك ليه ... زعلانه ليه».

. إنها آلية التتابع المعتمدة على البدء بآخر كلمة فى المقطع السابق وجعلها مرتكزا للخطاب الذى يدور على مدار المقطع الحالى فيما يمكن تشبيهه بامتداد مروحى، فالمقطع الجديد يستخدم هذه اللازمة للانطلاق إلى فضاءات متعددة وهو ما يحدث للتأكيد على الفوارق بين صوتى الشاعر و المغنى، ليكون المغنى مفسرا لما قد قاله الشاعر.

أيمكن أن يردنا ذلك إلى شكل السيرة الشعبية الذى يتناوب فيه سارد وشاعر ربابة، حين يحكى السارد نثرا ويعلق شاعر الربابة عليه غناء منطلقا من جملة سرده إلى التفسير والتأويل وإلقاء الضوء على مناطق مظلمة؟

إن الشكلىن يتشابهان فى إطارهما البنائى العام، وإن اختلفت الرؤية التى لا تعتمد هاهنا على المحمية، بقدر ولوجها داخل الذات، وهو ما يجعلنا نرى تلك الدلالة التأويلية فى تناوب الصوتين على دلالة مشابهة :

يقول الشاعر:

ياصاحبي ياااه

ياريت ترجع لنفسك فاضى

بنى آدم عادى

فاضى

زى كل الناس الفاضيين

ثم يقول :

ياصاحبي

انت فاضى

ولا مليون بالهموم

بتعلم

ولا لساك موهوم

إن دلالة كلمة «فاضى» التى يتمركز حولها الخطاب تتخلق لا من إحساس بالخواء، وإن أشارت إليه، ولكن من إحساس بالاقتراب من العادية «بنى آدم عادى»، وهو الأمر الذى يلتقطه المفنى بالتأويل :

يقول المغنى:

كان لى

صاحب فاضى

مالوش أمل بكره

وله

زمن ماضى

كان لى

صاحب فاضى

إن استخدام «فاضى» هنا قد حول الدلالة إلى خواء من نوع خاص يتعلق بالأمل فى المستقبل، وهو ما يمثل تطويرا للدلالة المشار إلى وجودها فى المقطع السابق على هذا.

غير أن هذا التابع لا يكون دائما معتمدا على شكل اللازمة اللفوية المشتركة هذا، بل يتعدى ذلك إلى الانطلاق من الصورة، التى يكون الشاعر فى الغالب قد كونها فى مقطعه، ليحاول المغنى فيما يلى ذلك أن يثبت جذور هذه الصورة فى واقعه، تلك الصورة التى بدأت لدى المغنى فى

البداية بسيطة ذات حدين اثنين واضحين (الحبيبة/

المركب) ليبنى عليها الشاعر عالمه المجازى ...

يقول الشاعر:

المركب دى

مش هى المركب

ولا دى البنت اللى كانت

واقفه فى الميه امبارح

بتدور الموج

حوالين خصرها العريان

يبدو الشاعر هنا مؤسسا رؤيته على المجاز، العالم
المجازى معتمدا على خياله الشاعر فى التقاط العلاقات
وبنائها فى صورتها المبهرة، غير أن المفنى حين يلتقط
الخيوط منه يقوم بالتأطير لهذا العالم الخيالى، فيلتقط
أحد الحدين من التشبيه ليقوم عليه عالمه الفنائى/ الكنائى
المتكامل.

يقول المفنى:

مركبه نايمه على الشط الحزين

وفى شارع المينا القديم

فى اسكندريه

كبدائية لتجذير الصورة داخل إطارها الواقعى، ثم بناء
عالمها الخاص ليخلص منه فى النهاية إلى ما يربط العالمين
المتجاورين :

المركبه دى

هى ومش هى

ميته أو حيه

ع الشط ولا على الميه

لساها فى عينى

نايمه على الشط الحزين

وف شارع المينا القديم

فى اسكندريه

ومن هنا يظهر أن هذا الاستخدام التتابعى لعناصر
مجازية، وإن هدف إلى تطوير الصورة والانطلاق بها إلى
آفاق أكثر رحابة، وثباتا فى الوقت ذاته، فإنها . كذلك

تهدف إلى خلق تلك الوحدة العضوية المعتمدة على خلق عالم خيالي، يوجّد في داخله ما يربطه بالواقع، إنه التجاور بين عالمين، رؤيتين، حين يظهر في كامل إمكاناته التعبيرية. وهو في الوقت ذاته ما يكمل دائرة الدلالة، بين الصورتين تكتمل الدائرة؛ ويتحول الجدل القديم إلى علاقة تتابع تظهر فيها شخصية كل صوت.

غير أن هذه الفكرة تجعل من الوقوف، على خصائص كل هذين الصوتين، أمراً ضرورياً .

إن الشاعر يتحدث عن مركب بطريقة الفلاش باك :

كانت معديه شايله الحياه

وهو الاستخدام الذي يضيفى حركية واضحة على صوت الشاعر، حين يستخدم آليات السرد في تكوين صورة شعرية ذات طابع خاص، تتعدد جوانبها، وليلتقطها المغنى ليطورها عن طريق صورته الوصفية الفنية المتخذة سمتا رومانتيكيا، ساكنا نسبيا .

الفارق الاول إذن يتبدى في الفرق بين الحركة والسكون، الحركة الظاهرة عن طريق استخدام صوت الشاعر لآليات

السرد مثل الفلاش باك، والمونتاج، والجمل المنبنية على الفعل وحركته.

وتتبدى أهمية استخدام المونتاج فى إسباغ ذلك الزخم من التفاصيل المتحركة فى اللقطات المتتابعة المتحركة بحرية فى الزمن ذهابا وجيئة، إضافة إلى تضافر الأفعال مع الإشارات الزمنية، الأمر الذى يجعل الصورة لا تعتمد على تشكيل ساكن قدر اعتمادها على الحركة.

يقول الشاعر:

الشريط ييلف

بحرى

والشاطبى

اللبان

والورديان

فى كل مكان حكاية

لاحظ أن الإشارات مكانية فى أصل وضعها، لكن هذه الدلالات المكانية تتحول إلى تعامل زمنى إذا نظرنا إلى

«الشريط بيلف» التى تدل على حركة الذاكرة فى الماضى،
وهو ما يؤكد «فى كل مكان حكاية» للدلالة على مخزون
الذاكرة.

غير أن الحركة لا تكون دائما على وتيرة واحدة، فهى
تهدا حين تعمل الذاكرة كما فى المثال السابق، وتسرع حين
يعمد الشاعر/ صوته إلى استخدام المونتاج المتقطع،
مطمعا بقاطع تقترب من السرد الخالص:

اللقطة دلوقتى

بترجعنى وياها

لليوم اياه

ثم يشرع فى سرد أحداث هذا اليوم، عبر توقيف
للقطة، لايؤثر على حركية الصورة، بل يبقى حافظا سرديا
حيويا، يفتح الباب لحركة من نوع آخر تعتمد على الأفعال:
«أغيب، وارجع لنفسى، أشوف ...» لتعدد فى النهاية
الأسس التى يتم على أساسها قيام الذاكرة بحركتها فى
الزمن: «لقطات بتبعد، ولقطات بترجع». هذه الحركة
الترددية التى تتكرر عبر الديوان فى أكثر من موضع لتطرح

جدلية متجددة ينتجها صوت الشاعر مع ماحوله، إنها تلك الحركة التى يعبر عنها فى أفعاله : «تحكى لنا ونحكى لها»، «تشغلنا ونشغلها»، «تطلعنا لقدام وترجعنا لورا»، «تجمعنا، وتفرقنا»، «البحر خدنى، البحر جابنى».

أيمكن لنا - إذن - أن نشبه هذه الحركة بحركة الموج فى البحر، حين يصدى الشاطئ ثم يعود مباشرة فى عكس الاتجاه الذى كان يسير فيه منذ لحظات، وهكذا بتكرار أم نقصر الأمر بأن نمزو هذه الحركة الترددية على السمة المميزة لصوت الشاعر، فى مقابل صوت المغنى المتأمل، الوصفى، المتخذ سمنا ساكنا.

ويتعلق بهذا أن صوت الشاعر يمكنه أن يستوعب/ يحتوى صوت المغنى حين لا يكون العكس صحيحا، وهو ما يعزز من الفرق الذى وضحناه حين الحديث عن الديوان السابق «برواز» حين تساوت مهمة الصوتين فى إحداث علاقة جدلية، لكن الأمر جد مختلف هنا، فالوظيفة مختلفة، والصوتان يكمل كل منهما الآخر، فالشاعر أكثر امتلاكا للغة، وصوته - هنا - أكثر قدرة على اللعب بالدلالات، كما يمكنه - حين يكون الأمر داعيا إلى التعبير

الذاتى - أن يعبر بصورة تشبه تلك التى يعبر بها صوت
المغنى، ويظهر ذلك حين يقول الشاعر:

مع كل يوم بيمر

تتولد حكايات

مع كل يوم بيمر

بتموت حكايات

مع كل يوم بيمر

البحر ينسى المشاعر

والليل يبنى السكات

ونلاحظ الإيقاعية الواضحة، والتكوين الفنائى،
والاعتماد على جملة - وإن كانت دلالتها حركية - فإنها
توحى بثبات الحكم، وإنها الرؤية الوصفية ذاتها التى يعتمد
عليها المغنى الذى يستوعب صوته صوت الشاعر، فى حين
يبقى صوت المغنى فى الدائرة التعبيرية المحكومة بوظيفته
الشعرية فى التجربة. وهنا يبدو اختلاط الأصوات لصالح
صوت الشاعر إشارة واضحة ومهمة للاعتماد على كلا
الصوتين فى اكتمال دائرة الدلالة .

ويتصل بتلك الحركية التي يتميز بها صوت الشاعر، ما يظهر في عنوان «برواز». حيث لا يعد البرواز مجرد إطار للصورة التي يرسمها الشاعر، ولكنه يتعدى ذلك إلى كونه فضاء تتحرك فيه الذات الشاعرة، وحتى لو تم تحديده في العنوان الأول «اسكندريه»، فإن هذا التحديد يبدو كثنائية، معبرا عن كونية واضحة وعامة، على الرغم من تواتر مفردات المكان «الاسكندريه» على مدار مقاطع الديوان، وباحتشاد لا يمكن معه التأويل. غير أن الشاعر يصل في النهاية إلى حقيقة هذا الفضاء الذي يتحرك فيه:

ما يفضلش م الأحباب

غير البرواز

والبحر

و اسكندريه

فهكذا يكون البرواز - حين يأتي أولا - إطارا يجمع ما بعده، وهو المعنى الذي يتكرر في أكثر من مقطع: «انت جوه البرواز ولا براه»، وللسؤال - بوصفه آلية تعبيرية - أهمية واضحة من حيث إسهامه في إيضاح الخط الذي

تسير عليه التجربة، فهذا السؤال - المتخذ سمًا وجوديًا -
يتضافر مع توقيف اللقطة «البرواز»، الأمر الذى يسهم فى
الوصول إلى تلك الصيغة التأملية التحليلية التى
تعلق/توقف الحركة لصالح لقطة أخرى تتبعها

تعالوا نوقف اللقطة دى

عند البحر

ليبدأ دور المغنى، حيث يبدو للشاعر - كذلك - إمكانية
الحديث المباشر للمتلقى، فى صورة توحيدهما معاً، وهو -
بالتالى - يوضح الآليات التى يتحرك بها داخل فضاء نصه،
لكى يفسح المجال - عند إيقاف اللقطة هذا - للمغنى لى
ينطلق من الهم الذاتى - فى اتجاه واحد - :

زمان

لما كان الشط خالى

اسكندريه لساهها هى

كنت الف الأرض وارجع

الأمل مالى عينى

ولما بتضيع ابتسامتى

ويتا طيارتى الورق

ألقى فى عيونك ملامحى ...

هكذا يسهم الصوتان - حين يمتلك كل منهما آلياته فى صياغة تجربة خاصة متوحدة، شديدة العضوية، والفعالية، عن طريق الوعى الشديد بهندسة البناء، وآليات التعبير الملائمة، غير أنه من الضرورى أن نلقى نظرة على القسم الأخير المتكون من أربع لوحات/براويز/حركات لصوت واحد هو صوت الشاعر، وكأن هذه اللوحات الأربع هى توقيف خاص للقطعة حتى يصبح الشاعر قادرا على الإلمام بالتفصيلات من جميع الجوانب. غير أنه من الممكن - كذلك - رؤية هذه المقاطع بوصفها قصائد تدور فى الفضاء نفسه، وتعتمد على صورة أخرى من صور عودة الذاكرة على شكل قفزات ماضوية للخلف، وتشكل فى الوقت ذاته دوائر مكتملة فى ذاتها، يساعد على اكتمالها اختيار العناوين الخاصة بكل منها، مع ملاحظة أنها هاجس بالعودة إلى شكل قصيدة النثر، فالشاعر والمغنى يتوحدان

فيها، حيث نمط اللغة الموزع بينهما، وحيث التداخل الواضح بين الشعرى والفنائى، وحيث البنية المقطعية، كلها تمثل هاجس الشعر ورغبة بنائية فى الانفلات من الصرامة الهندسية للبناء.

إن خصوصية التجربة . هاهنا . لأترد فقط إلى خصوصية هذا الصوت الشعرى، ولاتعود . كذلك إلى المزج بين الشعرى والنثرى، بل يمكن ردها إلى الجمع . فى آن واحد . بين انفلات الشعر، وإحكام البناء، الولوج بالتجريب وخلق أشكال جديدة، والرغبة فى التعبير . دون الإيغال فى الشكل . عن هموم الذات، وهو شكل أمثل للتجريب، حين يرتبط بأرضه وجذوره، وحين يعتمد على وعى المجرب بآليات فنه ودأبه على ممارسة تجريبه بهدف الوصول الدائم إلى أنسب الأشكال التعبيرية، وهى السمات التى نستطيع الجزم بوجودها فى هذا الديوان الذى يعد خطوة جديدة فى مشروع شعرى خاص بدأ فى ديوان أحمد توفيق السابق «برواز»، ولعله سيستمر فى التأكيد على هذا المشروع، حتى إذا استقرت القاعدة خرقها، واتجه إلى التجريب على شكل جديد، فهكذا يكون المبدع الحقيقى.

صدر للمؤلف

- فضاء أبيدوس	مسرحتان	هيئة الكتاب
- خجل التوت	شعر	هيئة الكتاب
- برواز	شعر	هيئة الكتاب

مطابع الهيئة المصرية العامة للكتاب

رقم الإيداع بدار الكتب ١٩٣١١ / ٢٠٠٣

I.S.B.N 977 - 01 - 8919 - 7